



Rabu, 16 Februari 2022
Ogen: Masmur 33: 18-19



Tetap IpegegehiNa



Covid 19 enggo 2 tahun nderpa doni enda, labo pernah si sangka maka mbue kel perubahan nggeluh si jadi bas masa enda. I bas melala perubahan, termasuk pe kesusahen mbue jadi i bas masa-masa enda. Lit kalak tambah warina tangkel pinakitl bas kulana, ntah ekonomina lalap la jumpa rejeki kai pe sidalankenna. Nungkun-nungkun ukurta engkai nge ndia maka Tuhan la campur tan. Ia maha kuasa, erkai pe ia banci, tumara mpemasap pinakit enda pe la ia ngasup, tumara ndungi perbeben si kitik pe la IA ngasup? Bage nina deba-deba si ngerana, kai nge ndia rencana Tuhan bas situasi enda.

Adi kitab Jesaya 59:1-2 ngatakenca labo kurang gedang tan Tuhan nampati, labo kurang pemegiNa kerna pertotonnta. Tapi Tuhan tetap Tuhan. Kerina siidahikena bas doni enda termasuk pe bas kegeluhen jelma manusia, nggo iperhitungkenNa alu seh kel detail ku sikitikna. Saja lit janjiNa si man jemakenta, i bas Masmur 33:18-19 enda maka nina IkawaliNa kalak singikutken Ia, ipulahiNa si erkemalangen man baNa, saja caraNa rikutken peratenNa. Erkiteken si enda, aminna gia jadi perbeben ras percuban bas geluhta, percayaken saja geluhta man Tuhan Dibata.

Dolat Dibata mahanca ietehna kai si jadi man banta nai, genduari ras pagin, janah ia ngenca ngetehsa bahaya ntah pasu-pasu si nimai kita i bas wari si pepagi. Tuhan desken kalak si ngenen arah ingan si meganjang, mbelang pengidah matana, tapi kita desken pengembara, terjeng si arah lebenta ngenca si idah. Adi ernalem kita man Tuhan guna ngaturken perdalinenta kutera pe labo banci kita mampa. Mari tetap ernalem man baNa ipegegehiNa kita. Tetaplah erpengarapen em gegehta. Lit paksana Tuhan mpejeneng badai, tapi lit ka paksana pediatna badai e, tapi itenangkenna kita. Sabap ateNa maka kita jadi kalak pergenggeng ras tahan uji.